

Bideas chena assentu

Che nues istrobadas dae bentu
in chelos incubidos de tristesa
mi muidan in conca cun lestresa
bideas chi disizan ausentu,
chi dimustran ebbia sa pretesa
de aere de pasu unu momentu.

(Si sun custrintas sempre in abbolotu
e no an tretta'e poder assentare
non lis bastat su tempus pro giagare
e non poden leare giustu annotu.
Sa mente chi non podet registrare
non resessit a tener su connatu.)

Ispero duncas chi apan assentu
custas bideas mias fuidoras,
chi cando intran sun ammajadoras
de biadìas e de bisos chentu,
ma poi lestras si nche faghen foras
e mi lassan in penas e trumentu.

Si mi daeren tempus su bastante
de fissare in conca sos cuntzettos
chi dana sos indicos pius derettos
pro fagher solu cantu est importante
non dia cherrer àteros pretzettos
pro esser de sa vida dignu amante.

Pro mi poder gosare una vida
briva de tribulias e affannos
e de fastizos minores o mannos.
Gai dia giogare sa partida
chena timire de connoscher dannos
finas chi s'avventura est concluida.